

## Սիրելի հայրենակիցներ,

Վստահ եմ, թէ անհամբեր կը սպասեք «Լրատու»ի եռամսեայ հրատարակութեան, տեղեկանալու Ներկայացուցչին, ինչպէս նաեւ Երեսփոխանական Գրասենեակին կողմէ տարուած առօրեայ աշխատանքներուն, գաղութի ներքին իրադարձութիւններուն եւ Կիպրոսի Զանրապետութեան օրէնքներուն առնչութեամբ կատարուած փոփոխութիւններուն կամ նորութիւններուն մասին:

Վերոյիշեալ տողերը անվարան ու հաստատօրէն կ'արձանագրեմ, քանի որ «Լրատու»ի հասցեացանկը վերջին չորս տարիներուն ընթացքին 20% յաւելում արձանագրած է: Գրասենեակ հեռաձայնելով, գաղութի անդամները կամ մեր հայրենակիցները իրենց հասցէները կը փոխանցեն, փափաք յայտնելով ստանալ «Լրատու»ն եւ կամ բնակարան փոխելու պարագային, տեղեակ կը պահեն մեզ նոր հասցէին կապակցութեամբ: Երախտագիտութիւնս կը յայտնեմ բոլորին, որոնք հետաքրքրուած են ու կը հետեւին մեր աշխատանքներուն:

Յունուարի մէջ, Կաթողիկոսական Փոխանորդ Վարուժան Արքեպիսկոպոսին եւ Ազգային Իշխանութենէն պատուիրակութեան մը հետ, այցելեցի Նիկոսիոյ Ս. Աստուածածին հին եկեղեցին, ուր UNDP-ACT-ի պատասխանատու Jaco Cilliers, մեզի տեղեկացուց վերանորոգութեան աշխատանքներուն երկու փուլերով իրականացուելիք ծրագիրին մասին: Ուրախ եմ յայտնե-

լու, թե սկզբնական աշխատանքները սկսած են եւ շուտով պիտի ձեռնարկուի առաջին փուլի գործադրման: Այս մասին անդրադարձած ենք 7-րդ էջին մէջ:

Մեր հայրենակիցներուն անցագրային ու զանազան տեսակի հարցերը դիւրացնելու նպատակով, Փետրուար 5ին եւ 6ին Կիպրոս հրաւիրեցի ՀՀ Յունաստանի եւ Կիպրոսի Դեսպանութեան հիւպատոս Տիկ. Լիանա Գրիգորեանը: Այս մասին կարդալ «Լրատու»ի յաջորդող էջերուն մէջ:

Փետրուարի մէջ տեղի ունեցաւ ՏԻՍԻ Կուսակցութեան կազմակերպած «Կիպրոսի Փոքրամասնութիւններու Զաղաքական Ապագան» նիւթով հաւաք մը, որու ընթացքին խօսք առին Կիպրոսի երեք Կրօնական Փոքրամասնութիւններու Ներկայացուցիչները: Ձեռնարկին գծով յաւելեալ մանրամասնութիւններ տրուած են «Լրատու»ի 12-րդ էջով:

Հոս կը փափաքիմ անդրադառնալ SIGMA հեռատեսիլի կայանէն Փետրուար 23ին սփռուած «Հայերը Կիպրոսի մէջ» յայտագիրին, որ յաջորդող օրերուն լայն արձագանգ գտաւ Կիպրացի հասարակութեան մօտ, որոնք դրական արտայայտութիւններով վերահաստատեցին Կիպրահայ գաղութին ունեցած կազմակերպածութիւնն ու իւրայատկութիւնը:

Ինչպէս գիտէք, այս տարի Հայկական Տեղասպանութեան 95ամեակն է: Որպէս տիպար ու պահանջատեր հայեր, իւրաքանչիւրիս պարտքն է մեր ներկայութեամբ քաջալերել եւ թիկունք կանգնիլ Հայկական Տեղասպանութեան Ոգեկոչման Յանձնախումբին կազմակերպած ձեռնարկներուն, վերանորոգելով մեր ուխտը ու սատար հանդիսանալով Հայ Դատին գծով տարուող գերմարդկային աշխատանքներուն:

Գալով Երեսփոխանական Գրասենեակի եւ Ազգային Առաջնորդարանի մօտալուտ միացեալ ձեռնարկին, հաճոյքով կը փոխանցեմ, թէ 9 Մայիս 2010ին, երրորդ անգամ ըլլալով դարձեալ պիտի այցելենք Ս. Մակարավանք: Յոյսով եմ, որ այս տարի եւս մեծ թիւով ազգայիններ կը մասնակցին այս ուխտագնացութեան:

Վերջերս, Մակարավանք այցելելու թերթիկին հետ միասին, ստացաք 17.03.2010 թուակիր հաղորդագրութիւնը, որու միջոցով գաղութը տեղեակ պահեցի, յառաջիկայ Յուլիս ամիսէն սկսեալ Նարեկ Վարժարաններու շրջանաւարտները անխտիր, երկու շաբաթով, Հայաստան ուղարկելու որոշում: Գոհունակութեամբ կ'ընդգծեմ, թէ երկար տարիներու ունեցած փափաքս վերջապէս պիտի իրականանայ եւ մեր պատանիները անմոռանալի ճամբորդութիւն մը պիտի կատարեն դէպի հայրենիք ու վերադառնան յիշատակելի տպաւորութիւններով: Այս գծով ձեզի ուղարկուած հաղորդագրութիւնը ամբողջութեամբ արտատպած եք «Լրատու»ի այս թիւին մէջ:

Իսկ, Ուրբաթ, 14 Մայիս 2010ին «Սեռային Դաստիարակութիւն եւ Առողջ Յարաբերութիւն» նիւթով ձեռնարկ մը պիտի ունենանք Առաջնորդարանի «Իւթիւճեան» սրահին մէջ, մեր պատանիներն ու երիտասարդները, ինչպէս նաեւ ծնողները քաջատեղեակ պահելու սեռային վատառողջ յարաբերութիւններու արծարծած վտանգներէն: Օրուան նիւթը յունարէնով եւ համակարգիչի օգտագործումով պիտի փոխանցէ Տիկ. Տերօ Հաճիլիօզուն, որ «Ընտանեկան Ծրագրում» Կազմակերպութեան նախկին գործադիր տնօրէնն էր: Խիստ կը քաջալերենք բոլոր 16 տարեկանէն վեր եղող երիտասարդներն ու անոնց ծնողները, օգտուելու այս շահե-

կան դասախօսութենէն: Ներփակ պիտի գտնէք ձեռնարկին մասին յաւելեալ տեղեկութիւններ պարփակող թերթիկը:

Խօսքիս վերջաւորութեան, ուրախութեամբ կը տեղեկացնեմ, թէ մօտ ապագային յունատառ թերթերուն մէջ լոյս պիտի տեսնէ Հայ ժողովուրդի ու Կիպրահայ գաղութի պատմական հոլովոյթին, մշակութային ժառանգութեան, լեզուին ու կրօնքին մասին յօդուածներու շարք մը, պատրաստուած Երեսփոխանական Գրասենեակի Օտար Մամլոյ Ներկայացուցիչ Ալեքսանդր Հաճիլիրայի կողմէ: Այս նախաձեռնութեամբ, կը միտինք Կիպրոսի բնակչութեան ծանօթացնել Հայ ժողովուրդի եւ Կիպրահայ գաղութի դարերու ընթացքին կերտած ու ժողովուրդներու պատմութեան մէջ իր իւրայատուկ դրոշմը ձգած ազգի մը առաքելութիւնը:

Սիրելիներ,

Հայ Առաքելական Եկեղեցւոյ Ս. Չատիկին առիթով ընդունեցէք իմ սրտագին բարեմաղթութիւնները:

Քրիստոս յարեաւ ի մեռելոց, օրհնեալ է Յարութիւնն Քրիստոսի:

**Վարդգէս Մահտեսեան**

**Կիպրահայ Համայնքի Պետական Ներկայացուցիչ**

## ԵՌԱՄՍԵԱՅ ԳՈՐԾՈՒՆԵՈՒԹԻՒՆ

Օտարահպատակներու եւ Ներգաղթի Բաժանմունքի (Aliens & Immigration Unit) կառույցներու փոխադրութեան պատճառով, Երեսփոխանական Գրասենեակի առօրեայ աշխատանքները մէկ ամսուայ դադարէ մը ետք, կանոնաւորութեամբ վերսկսան 7 Յունուար 2010էն սկսեալ:

Տեղին է յիշել, թէ մօտաւորապէս երեք ամիսներ անցած են տեղափոխութեան թուականէն, սակայն գործերը դանդաղ կ'ընթանան, անձնակազմի կարգ մը անդամներու պաշտօններու փոփոխութեան, յաճախակի համակարգչային խանգարումներու, ինչպէս նաեւ մեծ մասամբ թղթածրարներու տակաւին հին արխիւատուներուն մէջ գտնուելուն պատճառներով:

Միեւնոյն ժամանակ, Յունուար 2010էն խստացաւ երրորդ աշխարհի հպատակներուն Կիպրոս ժամանակաւոր այցելելու, դեսպանատուներէն անցագիրներուն մէջ կնքուած վաւերագրի (visa) պայմանները: Հրաւիրողին կողմէ դեսպանատուն ուղարկուած հրաւերին կողքին (սօտարին մօտ վաւերացուած), անհրաժեշտ է ապահովել նաեւ դրամատնային երաշխաւորագին (Bank Guarantee), հաստատուած Օտարահպատակներու եւ Ներգաղթի Բաժանմունքին կողմէ, որոնց հիման վրայ դեսպանատունը կը շնորհէ սահմանուած ժամանակամիջոցով եւ աներկարածօրէի ժամկետով (final) այցելութեան արտօնութիւն:

Իսկ, որպէս այցելու (visitor), Կիպրոս բնակութեան թոյլտուութեան երկարածգման դիմումնագիրները յետ այսու կ'ընդունուին որոշ վերապահութիւններով, նախօրօք Օտարահպատակներու եւ Ներգաղթի Բաժանմունքի տնօրէնուհիին ուղղուած նամակին հաւանութենէն

Ետք միայն:

Աշխատանքային Նախարարությունն ալ Յունուարէն սկսեալ որոշ սահմանափակումներ կատարեց կարգ մը արհեստներու գծով օտարահպատակ գործաւորներու եւ ուսանողներու աշխատանքային հրամաններուն կապակցութեամբ, Կիպրոսի մէջ անգործութեան ծաւալող տագնապին առաջըը առնելու միտումով:

### Այցելութիւն «Գալայճեան» Հանգստեան Տուն



Նոր Տարուայ առաջին օրը, Ուրբաթ, 1 Յունուար 2010ին, Տեր եւ Տիկին Վարդգէս Մահտեսեաններ, ընկերակցութեամբ Թեմիս Կաթողիկոսական Փոխանորդ Վարուժան Արք. Զերկէլեանի, այցելեցին «Գալայճեան» Զանգստեան Տուն եւ Ամանորեայ ու Ս. Ծննդեան լաւագոյն մաղթանքներով եւ անհատական նուէրներով պատուեցին մեր տարեց հայրերն ու մայրերը:

**Նիկոսիոյ Ս. Աստուածածին Զին  
Եկեղեցւոյ Վերանորոգում**



Ուրբաթ, 15 Յունուար 2010ին, Պետական Ներկայացուցիչը, ընկերակցութեամբ Թեմական Ժողովի ատենապետ Սեպուհ Դաւիթեանի, Վարչական Ժողովի ատենապետ Տոքթ. Անդրանիկ Աշճեանի եւ ճարտարապետ Ծոն

Կելիերեանի, հանդիպում մը ունեցաւ UNDP-ACT-ի պատասխանատուներուն հետ, որոնց հովանաւորութեամբ Նոյեմբեր 2009էն արդէն սկսած են Նիկոսիոյ Ս. Աստուածածին հին եկեղեցւոյ նորոգութեան աշխատանքները:

Ժողովին փոխանցուած է Ս. Աստուածածին եկեղեցւոյ եւ շրջակայ կառոյցներուն 2 փուլերով նախատեսուած նորոգութեան ծրագիրներուն մասին մանրամասնութիւններ:

Առաջին բաժինով պիտի նորոգուին եկեղեցին ու մայրապետանոցի վանատունը, որոնց համար արդէն իսկ ապահովուած է գումար մը, իսկ երկրորդ բաժինով պիտի նորոգուին Առաջնորդարանը, մանկապարտեզը, Մեկիքեան եւ Ուզունեան շէնքերն ու բակը:

Իսկ Կիրակի, 24 Յունուար 2010ին, պատուիրակութիւն մը բաղկացած Վարուժան Արքեպիսկոպոսէ, Պե-





տական Ներկայացուցիչ, Թեմական ու Վարչական ժողովներու ատենապետները եւ ճարտարապետ ճոն Կել-հերեանէ, այցելեց գրաւեալ շրջան, մօտէն տեղեկանալու սկսուած նորոգութեան աշխատանքներուն:

### ՀՀ Յունաստանի եւ Կիպրոսի Դեսպանութեան Հիւպատոսի այց



Երկօրեայ այցելութեամբ Հինգշաբթի, 4 Փետրուար 2010ին Կիպրոս ժամանեց ՀՀ Յունաստանի եւ Կիպրոսի Դեսպանատան անցեալ տարի նշանակուած Հիւպատոս Տիկ. Լիանա Գրիգորեան: Այցելութիւնը կազմակերպուած էր նախաձեռնութեամբ Պետական Ներկայացուցիչ Պրն. Վարդգէս Մահտեսեանի եւ համագործակցութեամբ ՀՀ Յունաստանի եւ Կիպրոսի Դեսպան Պրն. Գագիկ Ղալաչեանի, դիրացնելու համար Կիպրոս ժամանակաւոր կամ մշտական բնակութիւն հաստատած Հայաստանի Հանրապետութեան քաղաքացիներու անցագրային զանազան տեսակի հարցերը, **Շար. էջ 12**

**ՅԻՇԱՏԱԿԵԼԻ ՆՈՒԵՐ  
ՆԱՐԵԿ ՎԱՐԺԱՐԱՆՆԵՐՈՒ  
ՇՐՋԱՆԱԽԱՐՏՆԵՐՈՒՆ  
ՊՏՈՅՏ ԴԵՊԻ ՀԱՅԱՍՏԱՆ  
ՅՈՒԼԻՍ 2010ԷՆ ՍԿՍԵԱԼ**

Հաւատալով, որ սփիւռքահայ պատանի-պատանուհիներուն մատղաշ տարիքին Մայր Հայրենիք առաջին այցելութիւնը անհրաժեշտութիւն է, անոնց մէջ արթնցնելու Հայ մնալու, հայօրէն ապրելու եւ ապագային հայութեան ծառայելու իմաստով, յարմար նկատեցի իրագործել երկար տարիներէ ի վեր ունեցած փափաքս:

Անցեալ ամիսներուն, շարունակաբար խորհրդրդակցութիւններ ունենալէ ետք ՀՀ Յունաստանի եւ Կիպրոսի Լիազօր դեսպան Պրն. Գագիկ Ղալաչեանի հետ եւ գրաւոր ներկայացնելէ ետք առաջարկս, ուրախութեամբ կը յայտարարեմ, թէ որոշած եմ այս տարուայ Յուլիս ամիսէն սկսեալ եւ մինչեւ այն ատեն որ կը պահեմ Ներկայացուցիչի հանգամանքս, Նարեկ Հայկական Վարժարաններու շրջանաւարտները անխտիր, երկու շաբթուայ տեւողութեամբ, ուղարկել Հայաստան, ընկերակցութեամբ մի քանի ուսուցիչներու, որպէսզի այցելեն մեր Հայրենիքի պատմական ու տեսարժան վայրերը:

## **Այս շրջապտոյտին համար հարկ է տեղեկացնել, թէ**

- ◆ Օդանաւային տոմսակները, վիզայի եւ օդակայան երթելեկի ծախսերը պիտի յատկացուին իմ կողմէս
- ◆ Կեցութեան, սնունդի եւ շրջապտոյտներու ծախսերը պիտի հոգայ Հայաստանի Կառավարութիւնը

Այս հարցով, անցեալ ամիս բերանացի տեղեկ պահած էի Նաեւ Նարեկ Վարժարաններու հոգաբարձութեան ատենապետը, իսկ 16.03.2010 թուակիր Նամակով մըն ալ պաշտօնապէս հաստատած եղայ ծրագիրս իրագործելու որոշումը:

Յոյսով եմ, որ մեր շրջանաւարտներուն դէպի Հայրենիք այս այցելութիւնը պիտի ծառայէ իր բարի նպատակին:

**Վարդգէս Մահտեսեան**  
**Կիպրահայ Համայնքի**  
**Պետական Ներկայացուցիչ**

17.03.2010

ինչպես նաև հիւպատոսի ներկայութիւն պահանջող փաստաթուղթերու եւ հաստատագիրներու ապահովումը:

Նախօրօք առնուած ժամադրութիւններով, Ուրբաթ 5 եւ Շաբաթ 6 Փետրուարին, Կիպրոսի բոլոր քաղաքներէն Կիպրահայ Զամայնքի Պետական Ներկայացուցիչի Գրասենեակ ներկայացան աւելի քան 40 անհատներ ու ընտանիքներ, որոնք իրենց գոհունակութիւնը եւ երախտագիտութիւնը յայտնեցին այս կարգաւորումին գծով: Իր կարգին Զիւպատոս Տիկ. Լիանա Գրիգորեան բարձր գնահատեց կազմակերպուած բժախնդիր աշխատանքը եւ հիւպատոսութեան բացակայութեան Գրասենեակին կողմէ տարուած համադրումի աշխատանքը, ինչպես նաև անհրաժեշտ տեղեկութիւններ եւ դիմումնագիրներ հայթայթելու ծառայութիւնը:

Ուրբաթ երեկոյեան, Տիկին Զիւպատոսը ներկայ գըտնուեցաւ Ազգային Վարչութեան կազմակերպած «Արամ Խաչատուրեան» լարային քառեակի համոյթի ելոյթին, Պետական Ներկայացուցիչին եւ տիկնոջը ընկերակցութեամբ, իսկ Շաբաթ, նախքան Յունաստան վերադարձը, ան այցելեց Կաթողիկոսական Փոխանորդ Վարուժան Արքեպիսկոպոսին:

Յիշենք, թէ այս երկրորդ անգամն է, որ երկօրեայ այցելութեամբ Կիպրոս կը ժամանէ Զայաստանի Դեսպանութեան հիւպատոսը: Նախորդը կազմակերպուած էր 31 Յունուար 2007ին, հիւպատոս Լիլիթ Սարգսեանի օրօք:

### **«Կիպրոսի Փոքրամասնութիւններու Քաղաքական Ապագան»**

Զինգշաբթի 18 Փետրուար 2010ին, Կիպրոսի Պետական Զամալսարանին մէջ, միացեալ կազմակերպու-



Թեամբ ՏԻՍԻ Կուսակցութեան Երրօրեան Հարցերու եւ Կրօնական Փոքրամասնութիւններու յանձնակատարներուն, տեղի ունեցաւ հաւաք մը «Կիպրոսի Փոքրամասնութիւններու Քաղաքական Ապագան» սիւթով, որուն հրաւիրուեցան մասնակցելու եւ խօսք առնելու Մարտիրոսներու, Հայերու եւ Լատիններու Ներկայացուցիչները: Օրուայ պատգամախօսն էր Կիպրոսի Հանրապետութեան նախկին ընդհանուր դատախազ Ալեքոս Մարքիտիս:

Պետական Ներկայացուցիչը խօսք առնելով անդրադարձ կատարեց ընդհանրապէս Կրօնական Փոքրամասնութիւններու իրավիճակին եւ ի մասնաւորի ընդգծեց



Հայ Համայնքին դիմագրաւած դժուարութիւնները ներկայ պայմաններուն տակ, որոնցմէ ամենահիմնականը Յունարէնին՝ Մայրենի լեզուին նման լաւ տիրապետած ջըլլալը, լուրջ արգելք կը հանդիսանայ Կիպրահայ գաղութի երիտասարդ անդամներուն մրցելու եւ ապահովելու համապատասխան կառավարական պաշտօններ: Իսկ Մելգոնեան Կրթական Հաստատութեան փակումը ծանրակշիռ դերակատարութիւն ունեցաւ Կիպրահայութեան կեանքէն ներս, ըլլալով միակ հայեցի երկրորդական կրթութիւն մատուցող հաստատութիւնը: Շարունակելով, Պրն. Մահտեսեան շեշտեց Փոքրամասնութիւններու Ներկայացուցիչներուն խորհրդարանէն ներս համահաւասար իրաւասութիւններ ունենալու կարելոյութիւնը, որպէսզի անոնց դիրքը ալ աւելի ամրապնդուի ու ձայնը լսելի դառնայ:

### **SIGMA «Հայերը Կիպրոսի մեջ»**

Երեքշաբթի, 23 Փետրուար 2010ին, Պետական Ներկայացուցիչը, ընկերակցութեամբ պատմագետ Ալեքսանդր Զաճիլիրայի եւ ներկայութեամբ X-Factor-ի մասնակիցներէն Յովիկ Տեմիրճեանի, հրաւիրուեցաւ SIGMA հեռատեսիլի կայանի «Με την Ελίτα» յայտագիրէն ելոյթ ունենալու: «Հայերը Կիպրոսի մեջ» նիւթով, մօտ երկու ժամ տեւողութեամբ SIGMA կայանէն անդրադարձ կատարուեցաւ Հայոց Ցեղասպանութեան, Կիպրահայութեան անցեալի ու ներկայ պատմութեան, Կիպրոսի ժողովուրդին հետ ունեցած Կիպրահայութեան սերտ կապին ու Կիպրոսի հանդէպ Հայ գաղութին ունեցած երախտագիտութեան մասին: Հայ թէ յոյն անհատներ, յայտագիրի ընթացքին հեռաձայնային կապ հաստատելով, գնահատական խօսքեր արտայայտեցին Պետական Ներկայացուցիչին նկատմամբ: Յովիկ, որ X-Factor-ի մրցանքին իր մասնակցութեամբ հմայած է Կիպրոսի ժողովուրդը, յայտագիրը հարստացուց ու ճոխացուց կենդանի երկու երգ երգելով, անգամ մը եւս փաստելով իր տաղանդը: Իսկ Կիպրահայ ժողովուրդի պատմութեան ու ականոյթներուն քաջածանօթ ըլլալով, Ալեքսանդր Զաճիլիրան ճարտար ձեւով ներկայացուց գաղութին առանձնայատկութիւնները:

Եզրափակելով ըսենք, թէ յայտագիրի յաջող հեռարձակումը Հայ գաղութին նկատմամբ անսպասելի հետաքրքրութիւն եւ առաւել հիացմունք ստեղծեց Կիպրոսի գանազան խաւերուն մէջ:

### **Շնորհաւորական գիր**

Պետական Ներկայացուցիչը 1 Մարտ 2010 թուակիր գիրով մը շնորհաւորեց Պրն. Դանիէլ Զորպաճեանը եւ Պրն. Յովիկ Նասանեանը բացառիկ յաջողութեամբ բե-

մադրած «My Fair Lady» երաժշտական թատրերգության առիթով, մադթելով անոնց եւ «Premier Group»-ին ապագայ նորանոր նուաճումներ: Հոս տեղին է յիշել, թէ Տէր եւ Տիկին Մահտեսեաններ յատուկ հրաւեր ստանալով բեմադրիչներէն, Շաբաթ, 27 Փետրուար 2010ին, ներկայ գտնուեցան ներկայացումին, որ տեղի ունեցաւ Pallas թատրասարահին մէջ:

### **Ձեռնարկներու Ներկայութիւն**

Կիրակի, 31 Յունուար 2010ին, Տէր եւ Տիկին Մահտեսեաններ հրաւիրուեցան ներկայ գտնուելու Համազգայինի «Օշական» մասնաճիւղի կազմակերպած Կարդան Պետրոսեանի «1000 ու մի էլք» ներկայացման, որ տեղի ունեցաւ Առաջնորդարանի «Իւթիւճեան» սրահին մէջ:

Երկուշաբթի, 1 Փետրուար 2010ին, Պետական Ներկայացուցիչը Նիկոսիոյ սահմանին վրայ գտնուող Ledra Palace պանդոկին մէջ ներկայ գտնուեցաւ ՄԱԿի Ընդհանուր Զարտուղար Պան Զի Մունի ի պատիւ տրուած հիւրասիրութեան:

Կիրակի, 7 Փետրուար 2010ին, Պրն. Մահտեսեան ներկայ գտնուեցաւ Մարոնիթներու եկեղեցւոյ արարողութեան, Ս. Մարուն տօնի 1600ամեակին առիթով:

Ուրբաթ, 19 Փետրուար 2010ին, Պետական Ներկայացուցիչին եւ Սրբազան հօր հովանաւորութեամբ, բացումը կատարուեցաւ Հայրենի արուեստագիտուհի Կարինէ Ղահրամանեանի ցուցահանդեսին, որ տեղի ունեցաւ Առաջնորդարանի «Իւթիւճեան» սրահին մէջ:

Կիրակի, 21 Փետրուար 2010ին, Պրն. Մահտեսեան, յատուկ խնդրանքով Հայ Երիտասարդաց Միութեան Կարչութեան, բացումը կատարեց վերանորոգուած ակումբի հիւրասարահին ու իր տիկնոջը հետ ներկայ գտնուեցաւ այս առթիւ կազմակերպուած ճաշին:



Շաբաթ, 13 Մարտ 2010ին, Տեր եւ Տիկին Մահտեսեաններ հրաւեր ստանալով ներկայ գտնուեցան «Գալայ-ճեան» հաստատութեան վարչութեան կազմակերպած «Ցեղասպանութեան թանգարանը եւ Հայ-Թուրք արձանագրութիւնները» նիւթով դասախօսութեան, հովանաւորութեամբ Վարուժան Արքեպիսկոպոսի, որ տեղի ունեցաւ Առաջնորդարանի «Իւթիւճեան» սրահին մէջ: Օրւան պատգամախօսն էր Երեւանի Ցեղասպանութեան թանգարանի տնօրէն Հայկ Դեմոյեան:

Երկուշաբթի, 22 Մարտ 2010ին, Պետական Ներկայացուցիչը ներկայ եղաւ European University-ի կազմակերպած՝ միջ-կրօնական համագործակցութեան ծիրէն ներս լուսաբանական բնոյթ ունեցող ձեռնարկին, Հայ եւ Մարոնիթ համայնքներու մասնակցութեամբ:

Երեքշաբթի, 23 Մարտ 2010ին, Պրն. Մահտեսեան ծանօթացման հանդիպում մը ունեցաւ Կիպրոսի մօտ Հոլանտայի դեսպան Jan Eric van der Berg-ին հետ:

Չորեքշաբթի, 24 Մարտ 2010ին, Տեր եւ Տիկին Մահտեսեաններ ներկայ գտնուեցան Կիպրոսի Սիմֆոնիք Նուագախումբի նախաձեռնած «A musical pilgrimage across five continents» համերգին, սփրանս Սոնա Կարկալոյեանի եւ թենոր Պերճ Զրազեանի մասնակցութեամբ, Ստրովոլոսի Զաղաքապետարանի սրահին մէջ:

### **Ցաւակցագիր**

Երկուշաբթի, 8 Մարտ 2010ին, Պետական Ներկայացուցիչը ցաւակցագիր մը յղեց Հալէպի Հայոց Թեմի Առաջնորդ Շահան Եպս. Սարգիսեանին, Հալէպի ծառայասէր ու անձնուէր ազգային Տարօն Աւետիսեանի վաղաժամ մահուան տխուր առիթով: Ան իր խոր վշտակցութիւնը փոխանցեց նաեւ հանգուցեալին ընտանեկան պարագաներուն:



## Ծանօթանանք Կիպրոսի Հանրապետության Օրենքներուն

### Օտարահպատակներու եւ Ներգաղթի Բաժանմունք 2007թ. Օրենքի գլուխ 105

Աշխատանքային եւ Ընկերային Ապահովագրութեան Նախարարուհին, ի մտի ունենալով Կիպրոսի Հանրապետութեան աշխատանքային շուկային իրավիճակը եւ խորհրդակցելէ ետք հանրային ընկերութիւններուն հետ, որոշեց Օտարահպատակներու եւ Ներգաղթի Բաժանմունքի օրենքներու Հատ. 1 թիւ 18NE յօդուածի հիմամբ, ճշդուած 2007թ. գլուխ 105 գծով իր իրաւասութիւնները գործածել եւ 18.12.2009էն սկսեալ, սահմանափակեց օտար ուսանողներու աշխատանքային զբաղումներու իրաւունքը միայն ստորեւ նշուած մարզերէն ներս.-

- ◆ Մեծաքանակ ապրանք ներածող վաճառականներու մօտ բեռնակիր
- ◆ Պէնզինի կայաններու մէջ աշխատաւոր կամ ինքնաշարժ լուացող
- ◆ Ծերանոցներու մէջ հոգատար (եթէ այս մարզին մէջ օրենքով սահմանուած անհրաժեշտ պայմանները կը լրացնեն)

- ◆ Տնային գործերու առիթներով օգնական
- ◆ Հողագործական, անասնապահական, ձկնորսական գործերու աշխատաւոր
- ◆ Շէնքերու կամ կոյուղիներու մաքրութեան գործաւոր
- ◆ Fast Food հայթայթող ընկերութիւններու Delivery boy

Իսկ անոնք, որոնք կ'ուսանին զբօսաշրջիկութեան ոլորտէն ներս կամ կը հետեւին ելեկտրոնային կամ մեքենական ճիւղերու դասընթացքներու, փորձառութիւն ձեռք ձգելու միտումով, իրաւունք ունին աշխատելու ամառուայ արձակուրդի շրջանին միայն 1 Յունիսէն-15 Հոկտեմբեր, այն պայմանով, որ գործատիրոջ եւ Կրթական հաստատութեան միջեւ գրաւոր համաձայնագիր պահովելու դիմում ներկայացուած է Աշխատանքային Գրասենեակին մօտ:

**Վարդգես եւ Մակի Մահտեսեաններ  
Քրիստոսի Յարութեան  
Սուրբ տօնին առիթով  
կը շնորհաւորեն  
Կիպրահայ Յամայնքը  
եւ մեր հայրենակիցները,  
մաղթելով  
առողջութիւն եւ արեւշատութիւն:**

***Քրիստոս յարեաւ ի մեռելոց,  
Օրհնեալ է Յարութիւնն Քրիստոսի***

## **ԿԻՊՐԱՅԱՅ ՀԱՄԱՅՆՔԻ ՊԵՏԱԿԱՆ ՆԵՐԿԱՅԱՑՈՒՑԻՉԻ ԳՐԱՍԵՆԵԱԿ**

### **Քաղաքական Գրասենեակ**

9B & C Kastorias Street, Ayia Paraskevi, 2002 Strovolos  
Յեռախօս 22- 45 45 40, Յեռատիպ 22- 42 46 42  
Ել. Հասցէ office@armenianmp.com  
Ոստայնէջ՝ <http://www.armenianmp.com>

### **Խորհրդարանական Գրասենեակ**

Office Δ-2-2, House of Representatives, 1402 Nicosia  
Յեռախօս 22- 40 72 02, Յեռատիպ 22- 40 74 42  
Ել. Հասցէ vmahdessian@parliament.cy